

Perigo Morexini qu. sier Hironimo, et la sera cenai dal cavalier di Garzoni a San Polo, et fo bellissima cena. Era domino Justinian Justiniani ferier de Rodi, sier Antonio Capello procurator, sier Vetur Diedo, sier Marco Antonio da Leze, sier Marco Antonio Bernardo, sier Marco Barbarigo, sier Zuan Alberto di Garzoni, et io Marin Sanudo, et fo molte bandizon. Era invitati altri, ma non veneno.

191 *Per la momaria se dia far in piazza di S. Marco a la illustrissima Signoria el Zuoba de la caza 1532.*

Primo, venirà la dea Palas armata con uno scudo et uno libro in mano a cavallo de un serpente.

Secundo, venirà la Justitia a cavallo de uno elefante, con spada et balanza con una balla.

Terzo, venirà la Concordia a cavallo de una zigogna con uno sceptro in mano con una balla et trarà uno schiopo et vederassi dei zigognati.

Quarto, venirà la Vitoria a cavallo con la spada in man et scuto et uno sceptro con la palma dentro.

Quinto, venirà la Pace a cavallo de uno agnello con uno sceptro et olive dentro.

Sexto, venirà la Abundantia a cavallo de uno serpe cum la divatia in man con spighe, et trarà uno schiopo, et vederasse le spige.

A l'incontro de la Sapientia venirà l' Ignorantia a cavallo de un aseno con la coda in mano.

La Violentia a cavallo de uno serpe, la qual seminarà infra le infrascrite zinzanie.

La Guera et Marte sopra uno cavallo con spada et scuto.

La Penuria a cavallo de uno cane con el corno pien de paia.

Poi combaterà:

La Sapientia con la Ignorantia, et la Sapientia cazerà la Ignorantia de monte.

La Iustitia con la Violentia, cazerà la Violentia, *ut supra*.

La Concordia con la Discordia, cazerà la Discordia, *ut supra*.

La Vitoria con la Guera, *videlicet* Marte cazerà Marte, *ut supra*.

Saranno el tempio de Jano con trophei et arme de diverse sorte, el qual sarà fato con le sue colone et adornato come se richiede, et sarà aperto.

Sarà el tempio di la Pace adornato con el so idolo, et sarà serato.

Da poi anderà le soprascripte 6, a serar el tempio de Jano et aprir quello de la Pace.

Da poi combaterano la Abundantia con la Penuria, et la Abundantia cazerà la Penuria de là dal monte.

Da poi se redurà tutte 6 insieme et farano balli de più sorte, et sarà fine.

In questa sera fo fato una bellissima festa in caxa 192¹⁾ de sier Vetur Grimani procurator a Santa Maria Formosa, dove fono li reverendissimi cardinali suo fradelo Grimani et il Redolfi, quali steteno a la festa travestiti, et *etiam* hozi fono a veder la festa de piazza travestiti in caxa de Piero de Lodovici gastaldo de procuratori. Hor a questa festa fo da done, et vestite molte d' oro con zoie et perle assai, fo ballato et eravi molti prelati, *videlicet* el patriarca de Aquileia Grimani, l' abate de Rosazo Grimani, *olim* episcopo de Ceneda.

Ancora in questa sera fu fato un bellissimo bancheto da sier Piero Duodo, qu. sier Francesco a Santa Maria Zubenigo, dove fanno questi crichadori: sier Piero Bragadin, sier Nicolò Venier, sier Vincenzo Capello fo zeneral, sier Piero Valier, sier Leonardo Emo, sier Tomà Mocenigo, sier Giacomo Corner qu. sier Zorzi procurator, sier Zuan Ferro, et questi parenti et amici: sier Beneto di Prioli qu. sier Francesco, sier Antonio Dandolo et suo cugnado sier Sebastian Falier et lui sier Piero Duodo. A tavola vi fo pistachee, calisoni, pistachi, confeti, pernisse, fasani, paoni, colombini et tutto quel se pol dar; et fo giocato in do parte con grandissima consolation.

Questo ho voluto far nota, perchè la terra è su grandissime delitie de pastizar, *licet* valeno i paoni lire il per, fasani lire , pernisse lire , colombini lire , soldi , che è gran carestia, *tamen* tutto se trova per gratia de Dio. El formento calado lire 8, et manco el staro.

A dì 21. La matina, non fo letera alcuna.

Veneno in Collegio li Avogadori con li Cai de X et mandono li Savi fuora, et fono sopra uno certo matrimonio fato per sier Arimondo qu. sier Fantin, qu. sier Zorzi in una, qual era soa garzona, anni avanti et de vil condition, con la qual fece fioli et è graveda al presente, et par *noviter* l' habbi sposata, et fato el processo.

In questa matina introno prescidenti sora le acque sier Lorenzo Justinian et sier Antonio Capelo

(1) La carta 191* è bianca.